

**БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ**



**ДОМ НАРОДА
ПРЕДСТАВНИЧКИ ДОМ**

Комисија за избор и праћење рада
Агенције за превенцију корупције и
координацију борбе против корупције

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE**

**DOM NARODA
PREDSTAVNIČKI DOM/ZASTUPNIČKI DOM**

Komisija za izbor i praćenje rada
Agencije za prevenciju korupcije i
koordinaciju borbe protiv korupcije

Povjerenstvo za izbor i praćenje rada
Agencije za prevenciju korupcije i
koordinaciju borbe protiv korupcije

IZVJEŠTAJ O RADU

KOMISIJE ZA IZBOR I PRAĆENJE RADA AGENCIJE ZA PREVENCIJU KORUPCIJE I KOORDINACIJU BORBE PROTIV KORUPCIJE PARLAMENTARNE SKUPŠTINE BiH ZA 2014. GODINU

Sarajevo, mart 2015. godine

SADRŽAJ:

POGLAVLJE I. UVOD	3
POGLAVLJE II. IZVJEŠTAJ O AKTIVNOSTIMA KOMISIJE	4
Odjeljak A. Sjednice Komisije	4
Odjeljak B. Razmatranje Izvještaja o radu Agencije za prevenciju korupcije i koordinaciju borbe protiv korupcije	5
Odjeljak C. Razmatranje Izvještaja o radu Komisije za izbor i praćenje rada Agencije za prevenciju korupcije i koordinaciju borbe protiv korupcije za 2103. godinu	7
Odjeljak D. Ostale aktivnosti koje proizilaze iz odredbi Zakona o Agenciji korupcije i koordinaciju borbe protiv korupcije	8
Odjeljak E. Druge aktivnosti Komisije	9
POGLAVLJE III. REZIME	10
POGLAVLJE IV. PRILOZI	13

U skladu s čl. 9. i 10. Uputstva o metodologiji izrade izvještaja o radu komisija Parlamentarne skupštine Bosne i Hercegovine, Komisija za izbor i praćenje rada Agencije za prevenciju korupcije i koordinaciju borbe protiv korupcije Parlamentarne skupštine BiH na 2. sjednici, održanoj 13. 7. 2015. godine, usvojila je

IZVJEŠTAJ O RADU KOMISIJE ZA IZBOR I PRAĆENJE RADA AGENCIJE ZA PREVENCIJU KORUPCIJE I KOORDINACIJU BORBE PROTIV KORUPCIJE PARLAMENTARNE SKUPŠTINE BIH ZA 2014. GODINU

POGLAVLJE I. UVOD

Komisija za izbor i praćenje rada Agencije za prevenciju korupcije i koordinaciju borbe protiv korupcije (u daljnjem tekstu: Komisija) je nezavisno tijelo Parlamentarne skupštine BiH s nadležnostima utvrđenim Zakonom o Agenciji za prevenciju korupcije i koordinaciju borbe protiv korupcije (u daljnjem tekstu: Zakon) i Poslovníkom o radu Komisije.

Komisija ima devet članova, od čega tri predstavnika iz Predstavničkog doma Parlamentarne skupštine BiH, tri predstavnika iz Doma naroda Parlamentarne skupštine BiH, dva predstavnika akademske zajednice i jednog predstavnika nevladinog sektora.

Tako su u mandatnom periodu 2010. - 2014. članovi Komisije bili:

1. Dušanka Majkić, predsjedavajuća,
2. Borjana Krišto, prva zamjenica predsjedavajuće,
3. Mirsad Abazović, drugi zamjenik predsjedavajuće,
4. Staša Košarac, član,
5. Milenko Obad, član,
6. Beriz Belkić, član,
7. Milorad Vulić, član,
8. Niko Lozančić, član i
9. Sulejman Tihić, član.

Komisiju imenuje i razrješava Parlamentarna skupština BiH.

Mandat tri predstavnika iz Predstavničkog doma i tri predstavnika iz Doma naroda Parlamentarne skupštine BiH imenovana u Komisiju traje koliko i mandat saziva Parlamentarne skupštine BiH.

Mandat dva predstavnika akademske zajednice i jednog predstavnika nevladinog sektora traje četiri godine od dana imenovanja u Parlamentarnoj skupštini BiH.

Stručnu i administrativno-tehničku podršku Komisiji za izbor i praćenje rada Agencije za prevenciju korupcije i koordinaciju borbe protiv korupcije pruža Sekretarijat Parlamentarne skupštine BiH.

U skladu s članom 18. Zakona, Komisija ima slijedeće nadležnosti:

- a) prati rad Agencije;
- b) pokreće postupak imenovanja direktora i zamjenika direktora Agencije u skladu sa Zakonom;
- c) pokreće postupak razrješenja direktora i zamjenika direktora Agencije u skladu s članom 15. Zakona;
- d) razmatra izvještaje o radu Agencije najmanje dva puta godišnje ili po potrebi;
- e) razmatra izvještaje o reviziji finansijskog poslovanja Agencije.

POGLAVLJE II. IZVJEŠTAJ O AKTIVNOSTIMA KOMISIJE

Odjeljak A. Sjednice Komisije

U izvještajnom periodu održane su tri sjednice Komisije, kako slijedi:

- 14. sjednica Komisije - održana 5. 2. 2014.,
- 15. sjednica Komisije - održana 10.4.2014. i
- 16. sjednica Komisije - održana 8.5. 2014.

Na navedenim sjednicama razmatrano je ukupno 14 tačaka dnevnog reda.

Pored usvajanja tri zapisnika, s 13., 14. i 15. sjednice Komisije, na sjednicama su razmatrani i:

- Izvještaj o radu Agencije za prevenciju korupcije i koordinaciju borbe protiv korupcije za period 1. 1. – 30. 9. 2013. (sačinilac: Agencija za prevenciju korupcije i koordinaciju borbe protiv korupcije),
- Izvještaja o radu Agencije za prevenciju korupcije i koordinaciju borbe protiv korupcije za 2013. godinu (sačinilac: Agencija za prevenciju korupcije i koordinaciju borbe protiv korupcije),
- Izvještaj o radu Komisije za izbor i praćenje rada Agencije za prevenciju korupcije i koordinaciju borbe protiv korupcije za 2013. godinu,
- Informacija sa sastanka predsjedavajuće Komisije za izbor i praćenje rada Agencije za prevenciju korupcije i koordinaciju borbe protiv korupcije s direktoricom Fondacije „Konrad Adenauer“ u BiH,
- Informacija o posjeti članova Komisije za izbor i praćenje rada Agencije za prevenciju korupcije i koordinaciju borbe protiv korupcije Republici Sloveniji,
- Informacija o postupanju Agencije za prevenciju korupcije i koordinaciju borbe protiv korupcije u vezi sa Zakonom o izmjenama i dopunama Zakona o sukobu interesa u

institucijama vlasti Bosne i Hercegovine (sačinilac: Agencija za prevenciju korupcije i koordinaciju borbe protiv korupcije),

- Informacija o realizaciji zaključaka s 15. sjednice Komisije (sačinilac: Agencija za prevenciju korupcije i koordinaciju borbe protiv korupcije).

Svaka sjednica je, u skladu s odredbama Poslovnika o radu Komisije, imala nepohodni kvorum za rad i odlučivanje, koji podrazumijeva prisustvo sedam od devet članova na sjednici Komisije.

Predsjedavajuća Komisije Dušanka Majkić, zamjenik predsjedavajuće Mirsad Abazović, te članovi Komisije Niko Lozančić, Staša Košarac i Milenko Obad prisustvovali su svim sjednicama Komisije održanim tokom izvještajnog perioda. Zamjenica predsjedavajuće Borjana Krišto, kao i članovi Komisije Beriz Belkić i Milorad Vulić pravdali su svoje odsustvo s jedne sjednice Komisije, dok član Komisije Sulejman Tihic nije prisustvovao sjednicama Komisije.

Detaljniji prikaz održanih sjednica i razmatranih tačaka dnevnog reda, kao i prisustva članova Komisije na sjednicama dat je u tabelama 1. i 2. priloga ovog izvještaja.

Odjeljak B. Razmatranje Izvještaja o radu Agencije za prevenciju korupcije i koordinaciju borbe protiv korupcije

U skladu s nadležnostima pripisanim članom 18. stav 1. tačka d) Zakona, Komisija je tokom izvještajnog perioda na svojim sjednicama u dva navrata razmatrala Izvještaj o radu Agencije za prevenciju korupcije i koordinaciju borbe protiv korupcije.

Komisija je na 14. sjednici razmatrala *Izvještaj o radu Agencije za prevenciju korupcije i koordinaciju borbe protiv korupcije za period 1. 1. – 30. 9. 2013.* Tom prilikom, članovi Komisije konstatirali su da je tokom izvještajnog perioda Agencija svoj rad bazirala na prevenciji, a da je izostala aktivnost koordinacije borbe protiv korupcije. Ocijenjeno je da je evidentan napredak u načinu izrade izvještaja, kao i u radu Agencije uopće, te u vezi s tim Komisija smatra da je sazrelo vrijeme za konkretne aktivnosti i rezultate u radu Agencije, koje će prepoznati i javnost u BiH. Nadalje, konstatirano je da Komisija nije upoznata s aktivnostima Agencije po projektima IPA 2010. „Jačanje institucionalnih kapaciteta i tijela za borbu protiv korupcije“, odnosno „Jačanje institucionalnih kapaciteta i uključivanje mreže nevladinih organizacija u borbi protiv korupcije“, te uspostavljanjem sistema koordinacije relevantnih tijela za borbu protiv korupcije na svim nivoima u BiH. U vezi s navedenim, Komisija je zatražila od Agencije da joj u narednom periodu češće dostavlja informacije o ovim i sličnim realiziranim aktivnostima, kao i da blagovremeno informira članove Komisije o predstojećim obukama (seminarima i konferencijama) u kojima i oni mogu učestvovati, s ciljem zajedničkog stručnog usavršavanja predstavnika Agencije i Komisije. Također, članovi Komisije zaključili su da komunikacija između Komisije i Agencije u narednom periodu mora biti intenzivnija i bazirati se na rješavanju pojedinih tematskih pitanja. Osim navedenog, Komisija je sugerirala Agenciji da u budućim izvještajima iznese svoje procjene

koje će konstatirati u kojim sferama je korupcija najrasprostranjenija, te da s rezultatima ovih istraživanja i potencijalnim rješenjima za savladavanje tih pojava upoznaju Komisiju, kao nadležno tijelo Parlamentarne skupštine BiH. Posebno je apostrofirana uloga Agencije, kao jedne od najrelevantnijih institucija, kod davanja mišljenja o Prijedlogu zakona o javnim nabavkama u BiH, s ciljem ukazivanja na određena rješenja u Zakonu koja bi trebalo da budu podložna izmjeni. Na kraju, istaknuto je kako javnost u BiH nije jasno prepoznala dosadašnje rezultate rada Agencije, te naglašeno da bi aktivnosti Agencije u narednom periodu trebalo da budu jasnije prezentirane.

Nakon sveobuhvatne rasprave, Komisija je jednoglasno, sa 7 glasova „za“, primila k znanju Izvještaj o radu Agencije za prevenciju korupcije i koordinaciju borbe protiv korupcije za period 1. 1. – 30. 9. 2013.

Komisija je, nadalje, na 16. sjednici, razmatrala ***Izvještaj o radu Agencije za prevenciju korupcije i koordinaciju borbe protiv korupcije za 2013. godinu*** (u daljnjem tekstu: Izvještaj).

Nakon sveobuhvatne rasprave o godišnjem izvještaju o radu Agencije, s četiri glasa „za i tri glasa „protiv“, bez „suzdržanih“ glasova, uz postojanje proste većine glasova, ali neispunjavanjem uslova kojim se zahtijeva da ta većina uključuje i po jedan glas predstavnika konstitutivnih naroda, nije podržala Izvještaj o radu Agencije za prevenciju korupcije i koordinaciju borbe protiv korupcije za 2013. godinu u predloženom tekstu.

Kao osnovni razlozi za dostavljanje negativnog mišljenja o Izvještaju navedeno je da iz prezentacije realizacije Akcionog plana za provođenje Strategije za borbu protiv korupcije za period 2009. - 2014. uopće nije moguće dati kvantificiranu analizu s jasnim prikazom ispunjenih, odnosno neispunjenih obaveza iz Akcionog plana, te zaključiti stepen provođenja pojedinačnih specifičnih mjera iz ovog dokumenta, na osnovu čega bi se mogao dati odgovor na pitanje gdje se BiH nalazi sa aspekta provođenja Strategije godinu dana prije njenog isteka.

Također, članovi Komisije konstatirali su da je dosadašnji rad Agencije neprepoznatljiv u široj javnosti u Bosni i Hercegovini i da ne postoji jasna vizija njenog djelovanja u narednom periodu, a rad njenog rukovodstva ocijenili su nedovoljno energičnim, bezidejnim i s nezadovoljavajućim pristupom u rješavanju problema korupcije u bh. društvu, čemu u prilog govori i činjenica da se Bosna i Hercegovina po indeksu percepcije korupcije za 2013. nalazi tek na 72. mjestu od 177 zemalja svijeta, što pokazuje stagnaciju u rješavanju ovog problema.

Osim navedenog, članovi Komisije naveli su da su postojeća zakonska rješenja kojima se regulira oblast prevencije i borbe protiv korupcije na nivou BiH nedostatna i da je neophodno izvršiti izmjene i dopune prvenstveno Zakona o Agenciji za prevenciju korupcije i koordinaciju borbe protiv korupcije u dijelu koji se odnosi na njene nadležnosti, ali da rukovodstvo Agencije u prethodnom periodu ni u jednom navratu nije pokrenulo inicijativu za izmjenom ovog, kao ni drugih zakonskih rješenja na osnovu kojih Agencija djeluje.

Komisija je potom jednoglasno, sa sedam glasova „za“, predložila domovima Parlamentarne skupštine BiH da, u skladu s odredbama Poslovnika Predstavničkog doma i Poslovnika Doma naroda PSBiH, u dnevne redove svojih narednih sjednica uvrste razmatranje navedenog izvještaja, kako bi se Parlamentarna skupština BiH u potpunosti upoznala s predmetnom problematikom, a domovi Parlamentarne skupštine BiH donijeli relevantne zaključke.

Parlamentarna skupština BiH je na 68. sjednici Predstavničkog doma, održanoj 12. 6. 2014., odnosno na 39. sjednici Doma naroda, održanoj 10. 7. 2014., usvojila Izvještaj o radu Agencije za prevenciju korupcije i koordinaciju borbe protiv korupcije za 2013. godinu, odnosno nije podržala negativno Mišljenje Komisije.

Odjeljak C. Razmatranje Izvještaja o radu Komisije za izbor i praćenje rada Agencije za prevenciju korupcije i koordinaciju borbe protiv korupcije za 2103. godinu

U skladu s članom 18. stav (3) Zakona, Komisija je početkom prošle godine sačinila svoj Izvještaj o radu za 2013. godinu, koji je razmatrala na 14. sjednici. Izrada godišnjeg izvještaja o radu Komisije inicirana je izmjenom Zakona o Agenciji za prevenciju korupcije i koordinaciju borbe protiv korupcije od strane Komisije u prethodnom periodu.

Predmetni izvještaj, koji je izrađen u skladu s Metodologijom koju je usvojila Parlamentarna skupština BiH, Komisija je nakon jednoglasnog usvajanja na navedenoj sjednici, poslala u daljnju proceduru domovima PSBiH.

Predstavnički dom PSBiH je na nastavku 64. sjednice, održanom 26. 3. 2014., usvojio Izvještaj o radu Komisije. Tom prilikom Dom je, na prijedlog člana Komisije Beriza Belkića, usvojio i zaključak koji glasi: „*Zadužuje se Zajednička komisija za administrativne poslove da hitno donese odluku o ukidanju naknade za rad u Komisiji za izbor i praćenje rada Agencije za prevenciju korupcije i koordinaciju borbe protiv korupcije PSBiH za poslanike i delegate.*“

Dom naroda PSBiH je navedeni izvještaj o radu Komisije usvojio na 39. sjednici, održanoj 29. 4. 2014. Tom prilikom, Dom naroda usvojio je i sljedeći zaključak: „*Obavezuje se Vijeće ministara BiH da što prije analizira i razmotri Zakon o Agenciji za prevenciju korupcije i koordinaciju borbe protiv korupcije, te da utvrdi da li ima potrebe za njegovim dopunama kojima bi se precizirale odredbe o nadležnostima Komisije za izbor i praćenje rada Agencije za prevenciju korupcije i koordinaciju borbe protiv korupcije PSBiH, način računanja trajanja mandata, s obzirom na to da se radi o mješovitoj komisiji, te da, prema stavu Komisije, postoje određene pravne praznine koje treba regulirati.*“

Odjeljak D. Ostale aktivnosti koje proizilaze iz odredbi Zakona o Agenciji za prevenciju korupcije i koordinaciju borbe protiv korupcije

Kako je članom 10. stav (1) tačka a) definirano da u nadležnosti Agencije, između ostalog, spada i izrada strategije za borbu protiv korupcije, te izrada akcionog plana za prevenciju korupcije, Agencija je dostavila Komisiji Informaciju o planiranim aktivnostima u vezi sa izradom *Strategije za borbu protiv korupcije za period 2015. - 2019.* Komisija je navedeni dokument razmatrala na 15. sjednici, održanoj 10. 4. 2014., te tom prilikom donijela odluku da za člana interesorne radne grupe za izradu navedene strategije imenuje člana Komisije iz akademske zajednice prof. Mirsada Abazovića.

Kako je prof. dr. Mirsadu Abazoviću, članu Komisije iz akademske zajednice, te Miloradu Vuliću, kao članu Komisije iz nevladinog sektora, sa 13. 7. 2014. istekao mandat predviđen članom 17. stav (5) Zakona, Predstavnički dom PSBiH je na 66. sjednici, održanoj 14. 5. 2014, a Dom naroda PSBiH na 38. sjednici, održanoj 6. 6. 2014., u skladu s odredbama člana 17. b. Zakona imenovao *Privremenu zajedničku komisiju oba doma PSBiH za provođenje procedure imenovanja jednog predstavnika akademske zajednice i jednog predstavnika nevladinog sektora u Komisiju za izbor i praćenje rada Agencije za prevenciju korupcije i koordinaciju borbe protiv korupcije* (u daljnjem tekstu: Privremena zajednička komisija). U Privremenu zajedničku komisiju iz Predstavničkog doma imenovani su poslanici: Emir Kabil, Zvonko Jurišić i Aleksandra Pandurević, dok su iz Doma naroda imenovani delegati: Martin Raguž, Mehmed Bradarić i Mladen Ivanić.

Privremena zajednička komisija je, nakon isteka roka za prijavu na Javni konkurs, koji je objavljen 8. 7. 2014., konstatirala da je zaprimljeno ukupno 11 prijava, od čega je njih 10 prihvaćeno kao blagovremene s kompletnom i urednom dokumentacijom. Od ovog broja, Komisija je konstatirala da je sedam kandidata prijavljeno na upražnjeno mjesto člana Komisije iz akademske zajednice, a da su tri kandidata aplicirala na mjesto člana Komisije iz nevladinog sektora.

Privremena zajednička komisija oba doma PSBiH u potpunosti je završila svoj rad 9. 9. 2014. dostavljanjem domovima PSBiH Izvještaja o utvrđenju rang-listi za imenovanje jednog predstavnika akademske zajednice i jednog predstavnika nevladinog sektora u Komisiju. Predstavnički dom PSBiH na 73. sjednici, održanoj 25. 9. 2014., nije podržao dostavljenu rang-listu.

U vezi s navedenim, potrebno je da PSBiH, po formiranju novih saziva domova, raspiše novi javni konkurs za imenovanje jednog predstavnika akademske zajednice i jednog predstavnika nevladinog sektora u Komisiju za izbor i praćenje rada Agencije za prevenciju korupcije i koordinaciju borbe protiv korupcije.

Odjeljak E Druge aktivnosti

Tokom izvještajnog perioda Komisija je imala stalnu saradnju s rukovodstvom Agencije za prevenciju korupcije i koordinaciju borbe protiv korupcije, čiji su predstavnici bili pozivani i redovno prisustvovali svakoj sjednici Komisije.

Članovi Komisije su tokom izvještajnog perioda prisustvovali na nekoliko radionica i konferencija, čiji su organizatori bili predstavnici domaćih institucija, nevladinih organizacija iz BiH, kao i međunarodnih organizacija s programskim aktivnostima u BiH.

Jedna od tih *konferencija, pod nazivom: „Razvoj i jačanje upravljanja sistemom borbe protiv korupcije“*, održana je u zgradi PSBiH 4. 7. 2014., u organizaciji UNDP-a, u saradnji Vlade Kraljevine Norveške i Komisije za izbor i praćenje rada Agencije za prevenciju korupcije i koordinaciju borbe protiv korupcije.

U radu navedene konferencije učestvovalo je 60 predstavnika institucija vlasti BiH, akademske zajednice, nevladinog sektora i međunarodnih organizacija s programskim aktivnostima u BiH, među kojima i predstavnici Komisije za izbor i praćenje rada Agencije za prevenciju korupcije i koordinaciju borbe protiv korupcije PSBiH: Dušanka Majkić, predsjedavajuća Komisije, Beriz Belkić i Milorad Vulić, članovi Komisije, te Jovica Katić, sekretar Komisije.

Konferencija je održana s ciljem sagledavanja poštivanja ključnih međunarodnih normi iz oblasti prevencije i borbe protiv korupcije od predstavnika zakonodavne, izvršne i sudske vlasti na nivou BiH. Osim navedenog, ciljevi Konferencije bili su i upoznavanje s programskim aktivnostima u Bosni i Hercegovini u oblasti prevencije i borbe protiv korupcije, te prikazivanje regionalnih iskustava nadležnih tijela za primjenu nacionalnih strategija i akcionih planova za borbu protiv korupcije.

Njenim održavanjem zvanično je počelo i provođenje projekta „Jačanje kapaciteta parlamenata i ključnih institucija zaduženih za borbu protiv korupcije u Bosni i Hercegovini“, čiji je cilj da pruži podršku institucijama u izradi adekvatnog sistema za borbu protiv korupcije, kao i metodologija neophodnih za efikasnije funkcioniranje institucija na ovom planu.

U okviru Specijalističkog kursa iz oblasti sigurnosne politike BiH, član Komisije Beriz Belkić i sekretar Komisije Jovica Katić učestvovali su na *seminaru pod nazivom: „Strategija borbe protiv korupcije u BiH“*, koji je 25. i 26. 3. 2014. održan u Konjicu, u organizaciji Ministarstva sigurnosti BiH.

Kada je u pitanju saradnja s nevladinim sektorom u BiH, članovi Komisije učestvovali su u *evaluaciji Strategije za borbu protiv korupcije u BiH za period 2009. - 2014.*, koju je, u okviru projekta „Jačanje integriteta i dobrog upravljanja za efikasno provođenje Strategije za

borbu protiv korupcije u BiH od lokalnog do državnog nivoa“ proveo Transparency International BiH. Evaluacija Strategije izvršena je s ciljem provođenja analize efikasnosti njenih mjera u smislu kvaliteta strateškog dokumenta, kao i procesa njene primjene.

Osim navedenog, članovi Komisije su na zahtjev Centra za društvena istraživanja „Analitika“ učestvovali i u *intervjuu o iskustvima i refleksijama po samom fenomenu korupcije*, te postojećim mehanizmima za borbu protiv korupcije u BiH, kao i pozicije Agencije za prevenciju korupcije i koordinaciju borbe protiv korupcije u javnom prostoru u BiH.

Rukovodstvo Komisije je tokom prošle godine održalo određeni broj *sastanaka s predstavnicima međunarodnih organizacija u BiH*, među kojima su u prvom redu bili predstavnici Razvojnog programa UN-a u BiH (UNDP), Ambasade Kraljevine Norveške, ženevskog DCAF-a i Misije OSCE-a u BiH.

Primarna tema ovih razgovora bili su modaliteti unapređenja međusobne saradnje na polju prevencije korupcije i borbe protiv korupcije u BiH, kao i o potrebama za efikasnijim djelovanjem predstavnika zakonodavne i izvršne vlasti s pravosudnim institucijama na svim nivoima na polju suzbijanja korupcije u BiH, te poboljšanju ukupnog zakonodavnog okvira koji definira borbu protiv korupcije u našoj zemlji. Također, razgovarano je i o budućem zajedničkom radu na izradi nove strategije i akcionog plana za borbu protiv korupcije u BiH za period 2015. - 2019., kao i o edukaciji članova Komisije putem seminara i okruglih stolova s ciljem unapređenja njihovog budućeg rada.

Nakon usvajanja izmjena i dopuna Zakona, čime je Komisija zvanično postala nezavisno tijelo Parlamentarne skupštine BiH, na veb-stranici PSBiH (www.parlament.ba), u dijelu koji se odnosi na druga parlamentarna tijela, postavljen je i link ove komisije, na kojem se može vidjeti njen sastav, nadležnosti, podaci o održanim sjednicama, godišnji izvještaji o radu, te ostale aktivnosti Komisije, kao i podaci za kontakt (telefon, faks i e-mail).

POGLAVLJE III. REZIME

Izvještajni period obilježilo je nekoliko bitnih činjenica koje su značajno uticale na rad Komisije u 2014. godini.

1. Komisija u svom radu nije mogla računati na učešće člana Sulejmana Tihića, koji je, nakon teške bolesti, preminuo u septembru 2014. Nemogućnost gospodina Tihića da učestvuje na sjednicama istovremeno je značila da je Komisija stalno radila na ivici kvoruma, s obzirom na to da je, prema poslovničkim odredbama, svakoj sjednici Komisije trebalo prisustvovati namjanje sedam od devet njenih članova.

2. Komisija se, također, tokom izvještajnog perioda susrela i s problemima Agencije za prevenciju korupcije i koordinaciju borbe protiv korupcije koji su nastali izmjenama Zakona o sukobu interesa u institucijama BiH, kojim je institut sukoba interesa sa Centralne izborne komisije BiH prebačen u nadležnost posebne Komisije za odlučivanje o sukobu interesa, koju čine članovi PSBiH, s jedne strane, odnosno direktor Agencije za prevenciju korupcije i koordinaciju borbe protiv korupcije s njegovim zamjenicima, s druge strane. Navedenim izmjenama Zakona predviđeno je da stručne i administrativno-tehničke poslove za potrebe Komisije obavlja Agencija, što je podrazumijevalo da Vijeće ministara BiH pristupi izmjeni Pravilnika o unutrašnjoj organizaciji i sistematizaciji radnih mjesta Agencije. Nakon sveobuhvatne rasprave, koju je o ovoj informaciji obavila na 15. sjednici, Komisija je usvojila sljedeći zaključak: *“Pozivaju se Agencija i Centralna izborna komisija BiH da, kao Zakonom utvrđeni subjekti, što prije primijene odredbe člana 9. st. (6) i (7) Zakona o izmjenama i dopunama Zakona o sukobu interesa BiH („Službeni glasnik BiH“, broj 87/13, od 11. 11. 2013.), te da u skladu s odredbama ovog zakona izvrše međusobnu primopredaju poslova i osoblja, a koju su ove dvije institucije bile dužne izvršiti u roku od 60 dana od dana stupanja na snagu Zakona. Komisija podsjeća navedene institucije da neizvršavanje zakonskih odredbi predstavlja krivično djelo i poziva ih da poslove iz svoje nadležnosti u vezi s ovim zaključkom izvrše u najkraćem mogućem roku, kako bi se što hitnije ispoštovale odredbe Zakona o izmjenama i dopunama Zakona o sukobu interesa BiH.“*
3. Razmatrajući Informaciju o planiranim aktivnostima u vezi sa izradom Strategije za borbu protiv korupcije za period 2015. - 2019. godina, čiji je sačinilac Agencija za prevenciju korupcije i koordinaciju borbe protiv korupcije, Komisija je na 15. sjednici, održanoj 10. 4. 2014., donijela odluku da za člana interesorne radne grupe za izradu nove strategije imenuje člana Komisije iz akademske zajednice prof. Mirsada Abazovića. Interresorna radna grupa je tokom protekle godine održala nekoliko radionica, na kojima je izrađen prijedlog nove strategije i akcionog plana za borbu protiv korupcije za period 2015. - 2019., koje u narednom periodu treba da potvrdi Vijeće ministara BiH.
4. Važno je naglasiti i činjenicu da je tokom izvještajnog perioda Ured za reviziju institucija BiH dostavio u parlamentarnu proceduru Izvještaj o izvršenoj reviziji učinka o temi: „Pretpostavke za efikasan rad Agencije za prevenciju korupcije i koordinaciju borbe protiv korupcije“, čiji je sačinilac bio Ured za reviziju finansijskog poslovanja institucija BiH. Iako o ovom dokumentu nije raspravljala Komisija na svojoj sjednici, važno je naglasiti da su se članovi PSBiH izuzetno pozitivno odredili prema navedenom izvještaju, kada je on usvojen na 67. sjednici Predstavničkog doma, održanoj 3. 7. 2014., odnosno 39. sjednici Doma naroda PSBiH, održanoj 10. 7. 2014., bez glasova protiv.
5. Usljed nemogućnosti osiguranja kvoruma za održavanje sjednice Komisije, zbog isteka mandata dvojici članova Komisije iz akademske zajednice - Mirsada

Abazovića, odnosno nevladinog sektora - Milorada Vulića, te lošeg zdravstvenog stanja člana Komisije Sulejmana Tihića, Komisija tokom izvještajnog perioda nije bila u mogućnosti održati sjednicu na kojoj će raspravljati o Izvještaju o reviziji finansijskog poslovanja Agencije za prevenciju korupcije i koordinaciju borbe protiv korupcije za 2013. godinu, što je inače njena obaveza u skladu s članom 18. stav (1) tačka e) Zakona.

PREDSJEDAVAJUĆA KOMISIJE
Aleksandra Pandurević

POGLAVLJE IV. PRILOZI

Tabela 1.

Broj i datum održavanja sjednice	Broj razmatranih tačaka dnevnog reda	Prisustvo članova sjednicama komisije (%)
14. sjednica 5. 2. 2014.	6	7 članova ili 77,7 %
15. sjednica 10. 4. 2014.	4	7 članova ili 77,7 %
16. sjednica 8. 5. 2014.	4	7 članova ili 77,7 %

Tabela 2.

Ime i prezime člana Komisije	Broj i datum održavanja sjednice		
	14. sjednica	15. sjednica	16. sjednica
Dušanka Majkić	+	+	+
Borjana Krišto	+	- (op)	+
Mirsad Abazović	+	+	+
Staša Košarac	+	+	+
Milenko Obad	- (op)	+	+
Beriz Belkić	+	+	- (op)
Milorad Vulić	+	+	+
Niko Lozančić	+	+	+
Sulejman Tihić	- (op)	- (op)	- (op)